

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama! Poštovana braćo i sestre, draga djeco i omladino, esselamu alejkum!

Nastupio je mjesec Mevluda - rebi'ul-evvel - mjesec rođenja posljednjeg Božijeg Poslanika, Muhameda, s.a.v.s.. Danas je 5. rebi'ul-evvel, uskoro će 12. rebi'ul-evvel, dan rođenja našeg voljenog Poslanika, s.a.v.s..

U današnjoj hutbi, govoriti ćemo o mjesecu rebi'ul-evvelu, prilikama i okolnostima vremena u kome su tadašnji ljudi živjeli, te vjeri i običajima Arapa prije islama.

Rebi'ul-evvel je treći mjesec u hidžretskom kalendaru. Za muslimane poseban je 12. dan tog mjeseca jer asocira na rođenje posljednjeg Allahovog poslanika Muhammeda s.a.v.s.

Datum, 12. rebi'ul-evvel, uz to što je na taj dan rođen, Muhammed, s.a.v.s., 12. rebi'ul-evvela je došao u Medinu tako okončavši hidžru, a i njegovo preseljenje na Ahiret dogodilo se upravo tog dana. Ti događaji, obilježili su

nova poglavlja u svjetskoj povijesti. Dakle, rebi'ul-evvel je veoma značajan mjesec a njegov 12. dan još posebniji i značajniji.

Osnovni temelji i principi koji su prenošeni preko svakog poslanika njegovom narodu, u svim vremenima, bile su: **iman** – vjerovanje, **tevhid** – monoteizam i **robovanje** samo i jedino Allahu, predanost i pouzdanje samo u Njega, Jednog - Jedinog.

Iman - vjerovanje: „**Poslanik vjeruje u ono što mu se objavljuje od Gospodara njegova, i vjernici – svaki vjeruje u Allaha, i meleke Njegove, i knjige Njegove, i poslanike Njegove: „Mi ne izdvajamo nijednog od poslanika Njegovih.” I oni govore: „Čujemo i pokoravamo se; oprostite nam, Gospodaru naš; tebi ćemo se vratiti.**” (El-Bekare, 285)

Tevhid – monoteizam: „**Prije tebe nijednog poslanika nismo poslali, a da mu nismo objavili: „Nema boga osim Mene, zato se Meni klanjajte!”** (El-Enbija, 25)

„**Reci: „On Allah – je Jedan! Allah je Utočište svemu! Nije rodio i rođen nije, i nitko Mu ravan nije!”** (El-Ihlas, 1-4)

Na temelju vjere u Allaha i tevhida ili

monoteizma svaki poslanik, po primljenoj Objavi, pozivao je ljude i narode da robuju i da se samo Allahu obraćaju i Njemu pokorni budu.

„**Mi smo svakom narodu poslanika poslali: „Allahu se klanjajte, a kumira se klonite!” I bilo je među njima onih kojima je Allah na Pravi put ukazao, a i onih koji su zaslužili da ostanu u zabludi; zato putujte po svijetu da vidite kako su završili oni koji su poslanike u laž utjerivali.**” (En-Nahl, 36)

Safijjur-rahman El-Mubarekfuri u svom djelu *Zapečaćeni džennetski napitak*, o vjeri predislamskih Arapa, kaže: „*Većina Arapa slijedila je dugo vremena vjeru Ismaila a.s., koji ih je pozivao vjeri svoga oca Ibrahima a.s.. Oni su vjerovali u Boga, Jednog Jedinog i ispovijedali Božiju vjeru. To je trajalo jedno izvjesno vrijeme, dok nisu počeli zaboravljati Božije opomene i zabrane. I pored sve većeg zapadanja u idolopoklonstvo uvijek je postojao Vrhovni Bog - Allah, dž.š, kome su se, ipak, obraćali u teškim situacijama.*”

Vrijeme je učinilo svoje i ljudi su dozvoli sebi zaborav Boga, zaborav istinske vjere i

povratka. Poznato je da se Arabija nalazi na sredini između Azije, Afrike i Evrope.

Na tlu Arabije živjeli su, prvi u Kur'anu spomenuti, narodi Âd i Semud.

Na njenom tlu djelovali su Allahovi vjerovjesnici: Hud, Salih, Ibrahim, Ismail, te mnogi drugi i konačno, Muhamed, s.a.v.s..

U Arabiji je sagrađen prvi i najstariji mesdžid – Bejtullah, Kaba i Kibla muslimana.

U njoj su sva sveta, od Allaha odabrana mjesta; Kaba, Zemzem, Saffa, Merva, Mina, Muzdelifa, Arefat i grad Medina, grad Božijeg Poslanika Muhameda, s.a.v.s..

Na njenom tlu živjeli su predislamski Arapi koji su bili mušrici - mnogobošci koji su obožavali idole - kumire, kipove. Svako pleme imalo je svoga idola, svoje božanstvo. Povjesničari navode da je u haremu Kabe bilo 365 raznih idola, kipova od kojih su najpoznatiji: Hubel, Lat, Uzzat i Menat.

Predislamski Arapi bili su odani svim vrstama poroka: kocki, alkoholu, ubijanju, lažima, krađi, potvori, bludu, nemoralu, ubijanju i zakopavanju žive ženske djece.

U ovakvom ambijentu i okolnostima, moru idolopoklonstva, moralne degradacije i nazadnih običaja - u vremenu sveopćeg džahilijeta, došla je Allahova odredba, došao je mjesec rebi'ul-evvel, osvanuo je ponedjeljak, rođio se Allahov miljenik i poslanik. A onda, preko njega od Allaha dolazi Kur'an kao uputa, i islam kao jedina ispravna vjera - vjera čistog tevhida u Jednog, Jedinog, Svemogućeg Allaha, dž.š..

Na kraju današnje jubilarne 500-te hutbe, pozivam vas, braćo i sestre, sjećajmo se što češće Poslanika, s.a.v.s., salavatima, te obvezimo se da pročitamo bar jednu knjigu o Poslaniku, s.a.v.s., tijekom ovog mjeseca.

Molimo Uzvišenog Allaha, da nas ojača i učvrsti na putu Kur'ana i Sunneta Allahovog Poslanika, Muhammeda, s.a.v.s..

Amin!

Prethodne hutbe potražite na našoj stranici: www.medzlis-split.org

Pripremio: Vahid ef. Hadžić

Split, 24.11.2017.

